



Submisaun husi La'o Hamutuk Ba Komisaun D Parlamentu Nasionál

Proposta Orsamentu Jerál Estadu 2026 Setór Agrikultura no Ekonomia

29 Outubru 2025

Konteúdu:

Introdusaun no Observasaun Jerál	2
Rezultadu konsulta sidadania	3
Komparasaun alokasaun Orsamentu iha Setór Agrikultura	3
La'o Hamutuk nia sujestaun bazeia ba peskiza	4
Sub setór Pekuária, veterináriu no teknolojia	5
Sub setór Peskas	5
Sub setór Floresta	6
Komentáriu espesífiku ba planu asaun anuál no rekomendasaun (Anexa)	7

Introdusaun

Ba dala uluk, hato'o ami nian apresiasaun ba Parlamentu Nasional ne'ebé organiza audiénsia públiku hodi rona parte oin-oin iha ámbitu proposta OJE 2026 nian. Audiénsia nee atu ajuda informa perspetiva kritiku no faktu sira relasiona ho dezvoltimentu ekonomia no sosiál iha Timor – Leste, hosi pasadu, prezente no previzaun sira ba futuru. Nune'e, La'o Hamutuk ofereze analiza no rekomendasaun balun iha kraik, atu ajuda distintu Deputada no Deputadu sira atu diskute no debate proposta Lei Orsamentu Jeral Estadu ba tinan fiskál 2026 antes aprova.

Observasaun Jerál

Durante prosesu preparasaun proposta Orsamentu Jerál Estadu 2026, La'o Hamutuk (LH) hakerek karta aberta ida ba Ministru Agrikultura Pekuária Peska Floresta¹ (MAPPF), no halo pedidu audiénsia atu halo diskusaun ho ministru ho nian ekipa, atu komprende programa no atividade prioritariu ministériu nian, liuliu ho MAPPF inklui atu ofereze sujestaun, informasaun no faktu sira hodi kontribui ba planu no programa Governu nian, bazeia ba monitorizasaun no peskiza iha kampu.


Infelizmente Governu (ministériu) sira nian programa preparadu ona no ami la konsege hasoru Ministru ne'ebé ami fó karta pedidu inklui Ministru Agrikultura. Maske realiza enkontru no diskusaun ho Sekretária Estadu sira, maibé ami nian ideias no hanoín, la hola parte iha preparasaun programa ministériu nian. Ho nune'e, LH kontinua analiza, observa no akompaña diskusaun oin-oin liga ho proposta OJE 2026, no hakerek submisaun atu nafatin kontribui ideias konstrutivu sira, bazeia ba preokupasaun husi comunidade agrikultór sira durante peskiza iha munisipiu, liu-liu liga ho atividade agrikultura no produsaun ai-han.

Bazeia ba livru Deklarasaun Estratéjia Orsamentál 2026, Governu planu atu hasa'e kreximentu ekonomia to iha 4,3% durante tinan 2025, maibé kreximentu ne'e nafatin depende ba despesa públiku ne'ebé mai hosi Fundu Petrolíferu. Liu 85% PIB iha Timor-Leste kontribui hosi despesa públiku. Setór sira seluk seidak dezenvolidu no seidak iha kbiit atu fornese kontribuisaun ba Kreximentu ekonómiku no ekonomia real Povu no Nasaun nian.

Submisaun nee espesífiku liu ba setór agrikultura no sub setór importante sira, ne'ebé tinan barak seidak dezenvolve ho másimu atu prodús ai-han inklui bele inisia setór ekonomia sira seluk iha prosesu dezvoltimentu ekonomia nasaun. Analiza kona ba sustentabilidade fiskál bazeia ba realidade sósiu ekonómiku nasaun nian ho proposta alternativa hosi LH la inklui iha sub misaun nee, maibé iha submisaun ketak.

¹ [250424Karta aberta ba Ministru Agrikultura PAA OJE 2026](#)

Rezultadu konsulta sidadania



Tuir konsultasaun sidadania ne'ebé Ministériu Finansas halo antes prepara orsamentu estadu, haktuir iha gráfiku 59,7% sidaun maioria iha espetasaun boot katak: agrikultura nu'udar setór importante hodi kria empregu duke setór sira seluk. Signifika setór agrikultura, alende prodús ai-han, kria empregu, fornese matéria prima ba indústria ki'ik no indústria médiu sira inklui hamoris setór sira seluk.

Haktuir Primeiru Ministru iha diskursu durante konferénsia internasionál komérsiu TL-Australia iha Dili, hateten katak; la bele hanoin haruka de'it joven ba servisu iha rai-li'ur. La'ó Hamutuk konkorda ho deklarasaun Primeiru Ministru nian katak labele hanoin haruka de'it Joven sira ba servisu iha rai li'ur, maske sira sei hetan esperiénsia no aumenta sira nian rendimentu (osan) no hadi'a sira nian moris maibé labele haluha katak, ita lakon forsa traballu atu dezentolve setór agrikultura iha Timor – Leste.

Komparasaun alokasaun Orsamentu iha Setór Agrikultura

Orsamentu ba setór agrikultura iha tinan fiskál 2024-2025 no proposta 2026

Tinan	MAPPF	F.Infrastrutura	Munisipiu	RAEOA	Bambu Tibar	Totál
2024	30,694,052	11,373,447	5,715,722	1,183,273	457,701	49,424,195
2025	25,770,785	16,772,322	5,851,724	1,538,165	298,476	50,231,472
2026	22,200,883	13,233,455	6,079,909	522,840	388,220	42,425,307

Proposta OJE 2026 ba setór agrikultura hamutuk hotu token \$42 ekivalente ba 1,9% husi OJE konsolidadu tomak. Orsamentu ne'e aloka ba MAPPF, Fundu Infrastrutura (agrikultura), Agrikultura Munisipiu, Agrikultura RAEOA no Bambu Tibar. Alokasaun ba MAPPF hamutuk \$t22 atu finansia programa boot 5, sub programa 24 no atividade hamutuk 77; Sub setór hanesan agrikultura, hortikultura, kafé no plantas indústria anuál hamutuk token \$t9, no alokasaun ba funcionamentu institusionál hamutuk \$t8. Alokasaun ba sub setór importante sira, pekuária veterináriu no teknolojia hamutuk \$t1 liu, peska hamutuk \$t1 liu no ba

floresta hamutuk \$t1 liu, maski sub setór hirak ne'e importante, maibé alokasaun orsamentu hamutuk hotu \$t4 liu de'it.

Bainhira halo komparasaun, proposta orsamentu ba setór agrikultura kada tinan, menus kompara ho orsamentu tinan 2024 no 2025 nian. Proposta orsamentu 2026 aloka ba MAPPF hamutuk tokon \$22.2 menus (-\$t3.6) hosi orsamentu atuál 2025. Hamenus (ko'a) hosi programa Dezenvolvimentu Institusionál (-\$t0.64), hosi programa Agrikultura, Hortikultura, Kafe no Plantas (-\$t1.75), Pekuária (-\$88.866), Peska (-\$397.683) no Floresta (-\$690.974). Governu hamenus mós tokon \$1.2 husi servisu Agrikultura RAEOA nian no orsamentu agrikultura RAEOA 2026 hamutuk \$522.840. LH husu ba Komisaun D Parlamentu Nasional atu halo fiskalizaun ba terrenu no klarifika ho Ministru no ekipa kona situasaun dezenvolvimentu agrikultura.

Proposta orsamentu 2026 aloka ba Fundu Infrastrutura (FI) hamutuk \$13.233.455. Menus (-\$3.538.867) husi orsamentu 2025. Redusaun ne'e tanba projetu barak selebra ona kontratu, no kontinua (*on going*) hela e sei termina projetu sira to tinan 2026. Orsamentu tinan 2024, ba projetu retensaun hamutuk 15 no projetu re-apropriasaun hamutuk 37 ne'ebé sei kontinua ate data prezente, no balun sei to 2026. Ho razaun hirak ne'e, proposta orsamentu ba FI tinan 2026 hamenus no sei foka ba atividade Konstrusaun e Supervizaun ba Irrigasaun ne'ebé identifikadu ona.

La'o Hamutuk analiza katak, MAPPF investe barak ona ba infrastrutura irrigasaun, tratór no despeza administrativu sira, maibé falta atu dezenvolve poténsia produktu agríkola sira seluk ne'ebé TL iha, nudár setór ida ne'ebé dinámiku atu oferese solusaun sustentavel ba problema estruturál ne'ebé eziste tinan barak ona – hanesan empregu ba joven sira, kanaliza irrigasaun kiik ba toos, natar no reforsa hortikultura, inklui oinsa konservasaun bee, hari sentru formasaun agrikula integradu hodi fó formasaun agrikultor sira.

Rekomendasaun bazeia ba Peskiza Kona-ba Setór Agrikultura, Peska, Pekuária no Floresta

Timor-Leste iha potenciál agríkola, peska, pekuária no floresta, no artejenatu oin-oin maibé seidauk dezenvolvimentu ho di'ak. Rezultadu peskiza hatudu katak, comunidade agrikultura iha área rural, maioria depende ba produsaun husi toos, natar, hare rai maran, hakiak animal, peska no produktu hosi floresta. Atividade hirak nee nudár fonte ai-han principal ba konsumu no rendimentu familia, maibé nafatin enfrenta dezafiu infrastrutura, téknika, no apoiu husi Governu seidauk adekuadu.

La'o Hamutuk rekomenda atu Komisaun D Parlamentu Nasional halo koordinasaun di'ak ho Governu liu- liu ho Ministériu Agrikultura (MAPPF), Ministériu Komérsiu no Indústriia (MCI), Sekretária Estadu Kooperativa (SECOOP), Ministériu Koordinasaun Asuntu Ekonomia (MCAE) no SEFOPE tenke diskute no define estratéjia integradu atu kria programa, estratéjia no orsamentu. Programa agrikultura, peska, pekuária, floresta, komérsiu no artejenatu ki'ik sira tenke integra ba malu nu'udar ekonomia produtivu, renovavel no sustentavel. Dezenvolvimentu setór agrikultura, peska, pekuária no floresta la'ós de'it kestaun téknika, maibé prioridade polítika ba seguransa ai-han no dignidade povu Timor-Leste. Governu

presiza kontinua investe iha kapasitasaun umanu, koordinasaun inter-ministerial, no inovasaun sustentavel atu garante soberania alimentár no estabilidade ekonómika rai laran.

Sub-Setór Pekuária, Veterináriu no Teknolojia

Sub-setór Pekuária, Veterináriu no Teknolojia nudár potenciál boot iha Timor-Leste, relatóriu Census Agrikultura 2019, hatudu katak 95% uma-kain iha Timor-Leste mak envolve iha atividade hakiak animal, maibé seidauk trasa estratéjia polítika atu reforsa no promove nudár setór poténsia ba ekonomia comunidade. Limitasaun orsamentu ba sub setór nee, hatudu la dun iha motivaun di'ak atu promove no dezenvolve. Nudár ezemplu proposta orsamentu ba tinan 2026 aloka tokon \$1.6 ho kategoria ba saláriu no vensimentu rihun \$292,800, beins no servisu rihun \$799,353, no kapitál minor rihun \$538,840. Montante orsamentu ne'e konsidera seidauk adekuaudu hosi perspetiva polítika atu responde ba númeru maioria populasau nudár hakiak animal.

Pekuária nudár setór fundamental ba seguransa ai-han, rendimentu principal familia no ekonomia rural. La'ó Hamutuk observa katak alokasaun orsamentu seidauk reflete realidade no nesesidade iha setór pekuária. Esperiência tinan pasadu, balada hakiak rihun ba rihun mate tanba moras ou virus *African Swine Fever (ASF)* no Newcastle Disease. Faktu ne'e reflete frakeza iha sistema prevensaun, sistema intervensaun rápida hosi veterináriu no kontrolu sanitáriu hosi tékniku sira.

Dezafiu hirak ne'e, halo povu hakiak-na'in sira sente frustrasaun tanba falha iha atendimentu veterináriu, ekipamentu la adekuaudu, tarde no la konsege ajuda fó tratamentu adekuaudu ba balada hakiak sira ho lalais. Agrikultór barak lamenta tanba, animál hakiak mak fonte rendimentu prinsipál familia no ajuda sira nia ekonomia, tanba ne'e lakon animal, lakon ekonomia, no afeta direta ba seguransa alimentár.

La'ó Hamutuk rekomenda ba Governu em jeral no ba Sekretária Estadu Pekuária no Veterinária tenke fó prioridade alokasaun orsamentu ba programa Pekuária, Veterináriu no Teknolojia hodi reforsa di'ak liután servisu atendimentu ba populasau to iha area rural ho regular. Presiza énfaze ba kapasitasaun téknika, formasaun professional, no rede servisu veterináriu iha nivel lokál inklui preparasaun ekipamentu no teknolojia apropriadu hodi promove vasinasaun rutina ba animal hakiak sira. Kria programa tuir ita nia kontektu ho investimentu, inovasaun teknolojia no sistema kontrolu sanitáriu ne'ebé di'ak, bele garante autosufisiénsia iha produsaun animál no redús importasaun naan hosi rai li'ur.

Sub Setór Pesca

Timor-Leste, jeográficamente, iha liña kosteria ne'ebé naruk liu 700 km, ho tasi ne'ebé riku ho ikan no rekursu marínu oin-oin. Sub-setór peskas parte importante iha dezenvolvimentu ekonomia nasionál, maibé to'o agora seidauk dezenvolve ho di'ak, maski Governante sira uza "ekonomia azúl" hanesan orientasaun polítika. Peskadór sira nafatin hasoru dezafiu barak, liu-liu ekipamentu, fasilidade, infraestrutura no rekursu umanu ne'ebé limitadu. Dezafiu sira ne'e halo difisil atu explora (kaptura) no dezenvolve peska nudár fonte prinsipál ba ekonomia nian.

Iha proposta orsamentu 2026, Sekretária Estadu ba Peska propoin total tokon \$1,5 no aloka ba: Saláriu no Vensimentu rihun \$644; beins no servisu rihun \$700,280; no kapitál minor rihun \$104,160. Estrutura orsamentu ne'e, hatudu falta iha prioridade ne'ebé mak tenke implementa hodi sustenta dezvoltamentu sub-setór peska.

To'o agora, Timor-Leste konsidera hanesan nasaun ida ne'ebé prodús ikan no naan per kapita ki'ik liu iha rejiaun Sudeste Aziátika no Pasífiku. Produsaun peska no pekuária ki'ik mak kontribui ba situasaun seguransa ai-han no malnutrisaun ne'ebé kontinua afeta parte boot husi povu Timor-Leste. Realidade atuál mós hatudu katak Timor-Leste seidauk hatudu soberania alimentár, tanba kontinua importa ikan, boek no produktu "seafood" barak husi nasaun viziñu sira.

La'o Hamutuk rekomenda atu Governu aloka orsamentu ne'ebé adekua hodi kontinua dezvoltar setór peska, espesialmente hametin kapasidade peskadór sira (kapasitasaun no treinamentu) fasilita ró, mákina, no ekipamentu adekua atu peska iha parte tasi mane. Tenke hadi'a infraestrutura, inklui Tempat Pelelangan Ikan (TPI), no harii merkadu espesífiku ba ikan no produktu husi tasi. Aleinde ne'e, formasaun ba joven peskadór, inklui formasaun oinsá halo manutensaun ba mákina, ró no ekipamentu ne'ebé Governu apoiu, atu aseguza utilizaun ba tempu naruk.

Promove konservasaun rekursu marínu (budi daya); hakiak ikan, boek, kadiuk, kurita, tuir kondisaun tasi iha Timor-Leste. Programa akuakultura (hakiak ikan bee midar) la'ós de'it hanesan projetu temporáriu, maibé transforma ba atividade sustentavel iha nivel familia atu hadi'ak rendimentu familiar, promove konsumu ikan doméstiku, no prosesamentu ikan ho forma ne'ebé sustentavel no inovativu.

Sub-Setór Floresta

Proposta OJE 2026 hamutuk tokon \$1,278, menus rihun \$691 hosi Orsamentu 2025 tokon \$1,97. Alokaun ba Saláriu no vensimentu hamutuk rihun \$450,648, beins no servisu rihun \$646,535, no kapitál minor rihun \$80,705. Redusaun orsamentu ida-ne'e refleto prioridade ne'ebé seidauk estavel iha valorizasaun setór floresta nian, maski setór ida-ne'e iha kontribuisaun boot ba seguransa ai-han, ambientál no sustenta ekonomia comunidade rural sira.

Produktu floresta aleinde madeira no naun-madeira, iha produktu agro-floresta oin-oin no jardín botániku nudár laboratóriu moris. Floresta iha kapasidade kapta bee, infiltra bee ba rai okos, hamoris bee matan, irrigasaun no travasaun udan been (ba mota no tasi), redús impaktu dezastre naturais no restaurasaun ambientál. Floresta no Reflorestasaun mak halo balansu ba erozaun, rai halai no destruisaun infraestrutura hanesan estrada, ne'ebé kustu restaurasaun boot liu.

Konserva didi'ak floresta sei fó benefísiu múltiplu ba nasaun: produsaun ai-han, ai-moruk no materiál médisinal, promosaun turizmu, kriaun empregu, protesaun ambiente, edukasaun ambientál, no mós servisu ekosistémiku hanesan fatin ba balada moris sira. Programa Floresta tenke konsidera prioridade nasionál iha prosesu dezvoltamentu sustentavel nasaun nian.

La'o Hamutuk rekomenda katak kestaun floresta tenke integradu iha dezvoltamentu nasionál tomak, tanba iha dimensaun estratéjiku atu diversifika ekonomia nasionál. Setór ida-ne'e bele fó retornu boot ba nasaun, tantu iha aspetu ekonomia no sosiál, hanesan fonte produsaun ne'ebé sustentavel no reziliente ba mudansa klimatika.

Setór floresta tenke dezvoltave tui dinamika dezvoltamentu nasionál atu bele kontribui ba setór sira hotu iha ekonomia ida ne'ebé integradu. Programa reflorestasaun no konservasaun floresta prezisa dezvoltave hamutuk ho inisiativa polítika ne'ebé partisipativu tanba mundu inklui Timor-Leste enfrenta hela krize klimatika.

Komentáriu espesífiku ba planu asaun anuál no rekomendasaun (Aneksu)


Ekipa Agrikultura no Ekonomia, La'o Hamutuk



Elivania Correia Alves



Celestino Gusmao Pereira



Mariano Ferreira

Tabela, komentáriu espesífiku ba programa no atividade MAPPF iha Proposta OJE 2026

Livru II B Planu Annuais/pajina	Konteudu	Komentariu	Rekomendasaun
pag 1134	Atividade 5100206: Gestão de recursos Humanos	Jestaun rekursu umanu ne'e importante tebes iha instituisaun hotu inklui MAPPF. Tanba rekursu umanu prinsipál iha instituisaun hotu. Maibé alokasaun staf iha terenu menus liu atu fasilita tékniku di'ak ba agrikultór sira.	Atu reforsa no hadi'ak liu tan dezvoltimentu agríkola tenke muda servisu MAPPF no staf sira destaka iha Munisipiu no Postu sira atu fó apoiu di'ak liu ba comunidade iha área rurál MAPPF iha funsionáriu barak no facilidade barak maibé Trankado hotu iha Dili, Presisa destaka iha Munisipiu atu ajuda servisu besik liu ba comunidade.
Livru Planu anuais pag.1137	A3902.0.0: Autosuficiente da produção de arroz utilizando o SRI e o ICM, as técnicas híbridas e convencionais. Aumentar a produção de milho através de um sistema de intensificação e expandir a reserva de terras. Aumento da area expansão de legumes (soja, feijão-mungo, amendoim) e hortícolas (vegetais, batata Europa etc)	Programa SRI no ICM dala barak ona MAAPF sempre hamosu iha programa no atividade atu promove maibé dala barak seidak fó rezultadu ne'ebé di'ak hosi métodu ne'ebé introdús. Dezde 2008 halo ona intervensaun ho Sistema mekanizasaun inklui introdús programa SRI, ICM ho fini hare Hybrida. Gasta orsamentu barak, Produsaun kada tinan laiha mudansa signifikativu. programa no intervensaun falla, la iha ema ruma mak responsabiliza no kontinua repete. Ezemplu; programa Povu kuda governu sosa troka ba loja dó povu ikus liu mak loja agrikultura, hotu-hotu la la'o no hanesan projetu de'it no la sustentavel, maski ideias ba programa hirak ne'e di'ak. Gasta osan barak rezultadu la iha, tuir tan mak programa one village one product la'o tinan balun para. MAPPF harii Centru Dezenvolvimentu Agrikula Komunitaria, gasta osan estadu barak, sentru abandonadu no la iha ema ruma mak responsabiliza.	Parlamentu Nasional tenke halo fiskalizasaun didi'ak tantu ba dokumentus programa no realidade iha kampu, liuliu ba iha área remotas/rurál. Ho nune'e klarifika no husu responsabilidade ba ministériu implementadór, tanba gasta osan povu nian maibé la hatudu rezultadu iha produsaun. MAPPF tenke dezenvolve planu programa tuir situasaun réal no kontestu iha Timor-Leste. Labele opta ka copy pasted de'it Sistema hosi rai seluk ne'ebé la relevante iha TL. Prátika SRI no ICM, nu'udar métodu foun, presiza kapasitasaun no treinamentu atu utiliza, Presiza hakle'an iha Sentru ne'ebé estabelese ona nu'udar peskiza, tuir mai bele hatudu rezultadu ba toos na'in sira atu banati tuir.

Pag. 1138	Atividade A390200: Implementar e Desenvolver Culturas de Horticultura Comunitária	Atividade desenvolve horticultura komunitária ne'e importante e prinsipál atu diversifika produsaun ho nune'e bele ajuda ekonomia toos na'in sira. Problema malnutrisaun as, fatór ida mak konsumu ai-han la ho balansu, konsumu karbohidratu barak liu duke vitamina, proteína no minerál. Modo no horticultura tenke continua promove iha komunidadade ida-ida tanba merkadu sempre iha loron-loron no ajuda hadi'ak nutrisaun.	Horticultura komunitária importante no tenke mellora no continua promove iha suku no aldeia hotu Presiza ajuda fini, kapasitasaun tékniku, bee no prátika agríkolá di'ak inklui formasaun atu prodús pupuk no pestisida orgániku ba komunidadade produtór hotu. Governu bele fó subsídiu ba pupuk orgániku no pestisida orgániku atu la depende ba rai li'ur no prodús modo no horticultura ho saudavel no sustentavel, di'ak ba saúde no ambiente Tenke kanaliza Irrigasaun ne'ebé iha ona to'o ba suku no aldeia sira atu motiva komunidadade prodús horticultura no produktu oin-oin
Pag. 1139	Atividade A390202: Implementar e Desenvolver Outras Culturas Alimentares (soja, feijão mungo, amendoim, etc) e promover boas práticas agrícolas	Atividade ne'e importante no tenke continua reforsa tanba toos na'in sira prodús hela, teknikamente presiza diversifika di'ak liután atu iha variedade ai-han oin-oin Fore keli, fore-mungu, fore rai, koto no fore oin-oin moris di'ak iha área foho no rai tetuk sira. produktu ne'e bele ajuda rendimentu, bele kontribui konsumu saudavel no bele halo prosesamentu ba hahán oin-oin ho valór di'ak	Tenke continua desenvolve no prodús nu'udar prioridade iha atividade MAPPF nian. Promove produsaun ho orgániku no naturál Tenke conserva didi'ak fini koto, fore oin-oin ne'ebé eziste tinan naruk ona iha Timor. fini hirak ne'e, adapta no rezilente ho klima Timor nian. Tenke promove, prezerva produktu, nudar identidade ida. Programa irrigasaun tenke continua kanaliza to'o ba suku no Aldeia, atu motiva komunidadade prodús variedade ai-han oin-oin no promove fini lokál no fini orijinal sira Produto lokál no orijinal hirak ne'e, tenke prezerva iha jardín Botaniku nu'udar laboratóriu moris
Pag. 1139	Atividade A390210: Implementação Hidroponico(cultivação sem solo)	Implementasaun Sistema hidroponiku ne'e importante maibé Sistema ne'e nessesita kustu tanba material barak tenke importa. Programa ne'e di'ak liu introdús iha sidade urbanu ho espasu ne'ebá ki'ik	Rekomenda ba Governu atu dezeña Sistema hidroponiku ida mais simples la ho kustu boot, Teknikamente fasil atu adopta no presiza ai-moruk assesivel atu previene moras

		Teknikamente se introdús teknolojia foun ezije koñesimentu aas, fundus no skil, tanba sei introdús ka aumenta proteína iha bee atu prodús no, fasil hetan moras ho naran fusarium verticilium.	Introdús ho Material lokál sira bele promove Jardim agrikultura iha uma huun ho téknika hanesan.
Pag 1139	Atividade A390211: Estabelecimento Centro Multiplicação de Parasitoit	Sentru Multiplikasaun Parasitoit ne'e importante tebes tanba atu uza Insektu hodi kombate peste ka insektu seluk ne'ebé atake hare, batar no produktu sira. Atu dezenvolve sentru ba programa ne'e, tenke iha Sistema no laboratóriu ne'ebé di'ak atu halo peskiza no teste. Tanba ne'e, tenke investe ba Universitariu ka institutu balun atu fokus halo estudo no dezenvolve. karik bele aprende husi esperiênsia nasaun seluk ne'ebé halo ona atu identifika Vantagen no dezvantajen.	Programa no atividade ne'e tenke integra iha sentru klínika veternaria atu masimiza liu tan nian funsionamentu Presiza kolaborasaun ho Universidade atu hala'o atividade ne'e nu'udar peskiza ba asunto ne'e Presiza facilidade adekuaudu atu suporta sentru ne'e no dezenvolve servisu sira ho qualidade
Pag 1139	Atividade A390213: Revitalizar Zonas Agro-ecológicas de Utilização Sustentável das Maquinas e Equipamentos Agrícolas	Atividade agro-ekolojia ne'e importante tanba konsidera siklu natureza, respeita ambiente no biodiversidade hirak ne'ebé moris. KESTAUN mak atividade Revitalizar iha planu asaun ne'e kontradís ho prinsípiu Agro-Ekolojia nian, tanba sei halo intervensaun ho mákina no ekipamentu agríkola. Atividade ne'e ninia objetivu la klaru	Revitalizar zona agro ecolojiku ne'e nian objetivu atu hadi'ak fali rai, ambiente ne'ebé hetan estragus no área sira ne'ebé la produtivu. Atu Revitaliza di'ak liu mak kuda ai-horis barak iha área sira ne'ebé hetan danus barak, ai-horis tipikal iha zona ne'e rasik Kria lei no regulamentu forte ba Florestal atu labele hetan destruisaun husi atividade umana. HAPARA uza mákina atu halo revitalizasaun ba agro-ekolojia, tanba kustu karun no kria dependênsia ba Importa
Pag. 1145	Atividade A400100: Forca de Trabalho para Atividades Prestação de Serviços no Terreno	Governu estabelese ona Centru 5 atu dezenvolve agrikultura integradu. sentru desenvolvimento Treinamentu Pekuaria iha Ratahu-Viqueque, Pato-Lautem, Dotik-Manufahi, Natar-bora no Korluli-Maliana	Tenke destaka espesialista pekuária no veterináriu iha kada sentru atu ajuda no reforsa di'ak liután staf sira iha sentru hotu. Tenke koloka téknika no estensionista ho espesialidade oin-oin iha kada sentru atu promove no dezenvolve nu'udar modelu atu ba futuro, agrikultór sira bele aprende no dezenvolve iha sira nia fatin

Pag 1146	Atividade A400203: Melhoria do Funcionamento de CDTP Dotik, Lactos, Pato, Baricafa, Macelap e Lacluta	La'o Hamutuk observa katak, programa CDTP ne'e importante no di'ak, tanba promove to'os integradu inklui hakiak karau atu prodús Susuben hosi karau Timor. Presiza investe no tau orsamentu atu dezenvolve nu'udar modelu. Maski nune'e, Se iha dezafiu barak ne'ebé staf sira CDTP lamenta. Traballadór barak mak kontratadu no bainhira sira hapara husi servisu sentru abandona, pastajen sira mate hotu la iha ema atu tau matan ba Karau sira iha Sentru. Servisu Veternariu Tenke destaka permanente iha sentru hotu atu kuidadu animál no deteta moras sira Promove programa subsídiu hahán animál (subsídiu pakam ternak) atu motiva comunidade kontinua hakiak no prodús animál	Atu promove di'ak liután, Tenke kria matadalan ka SOP (standar operating procedure) atu ajuda staf sira iha kampu - Oinsa fó han karau ho ai-han ida ne'ebé teknikamente standar, Oinsa ninia porsaun han iha tempu dadeer, lokraik no kalan, inklui presiza hahán saida tan atu fó han ba Karau Tuir targetu ne'ebé ita hakarak - Atu Karau isin di'ak no saudavel Suplementu saida tan mak tenke fó karau hirak ne'e - Konsulta no halo Vasinasaun ho kontrolu didi'ak no rutina atu garantia karau nia saúde no moris saudavel nafatin - Fo kaben Karau no tratamentu saida mak tenke halo - Bainhira karau Hahoris (iha oan) tratamentu saida mak tenke prepara no kuidadu - Atu prodús susubeen karau, infraestrutura oinsá mak tenke prepara, no Material saida de'it mak tenke prepara atu prodús Susuben - Oinsa atu konserva, inklui lletrik, konjeladór, no materiál importante sira seluk Rekruta ema tékniku atu servisu permanente iha CDTP sira - Tenke koloka Especialidade iha sentru hotu, atu tau matan ba programa prodús karau susu been Fasilidade hanesan fatin hakiak karau, manu, manu rade, bibi, fahi nst la tuir standar presiza iha dezeña ida ne'ebé adekuada atu animál sira labele husi de'it iha li'ur
----------	---	--	---

Pag. 1146	Atividade A400204: Introduzir Modelo de Produção de Leite através de Búfalo (karau metan)	Rezultadu peskiza LH, Sentru CDTP bainhira governu investe di'ak Dezenvolve agrikultura integradu no kombina agronomia, pekuária, floresta iha fatin ida nia laran Tenke prepara facilidade ba traballadór sira atu servisu, Orsamentu atu responde ba nesesidade sentru sempre tarde no ema tékniku iha CDTP tenke vizita rutina.	Atu promove di'ak liután, Tenke kria matadalan ka SOP (standar operating procedure) atu ajuda staf sira iha kampu - Oinsa fó han karau ho ai-han ida ne'ebé teknikamente standar, Oinsa ninia porsaun han iha tempu dadeer, lokraik no kalan, inklui presiza hahán saida tan atu fó han ba Karau Tuir tergetu ne'ebé ita hakarak - Konsulta no halo Vasinasaun ho kontrolu didi'ak no rutina atu garantia karau nia saúde no moris saudavel nafatin - Fo kaben Karau no tratamentu saida mak tenke halo - Bainhira karau Hahoris (iha oan) tratamentu saida mak tenke prepara no kuidadu - Atu prodús susubeen karau, infraestrutura oinsá mak tenke prepara, no Material saida de'it mak tenke prepara atu prodús Susuben tenke koloka Especialidade iha sentru hotu, atu tau matan ba programa prodús karau susu been
Pag. 1150	Atividade A410102: Desenvolvimento Integrado das áreas costeiras e do mar	Dezenvolvimentu integradu ne'e mak ideál atu aproveita didi'ak poténsia ne'ebé iha. Área kosteira iha, hosi kedan Batugade to iha Tutuala-Lospalos furak no iha rekursu oioin. Programa hanesan kada tinan sempre iha maibé implementasaun seidak la'o didi'ak. Setór peska mak tenke hatene liu kona-ba oinsá atu dezenvolve no oinsá aloka orsamentu hodi implementa Atividade konservasaun mariña tuir lolos tenke tau iha prioridade Orsamental atu halo. Tanba bainhira	Tenke aloka orsamentu tan atu dudu programa importante hirak ne'e atu diversifika produsaun. Ezemplu iha área kosteira aleinde promove programa peskas (kaptura ikan, hakiak ikan, boek no kadiuk iha tasi), dezenvolve fatin paseiu ho facilidade adekua, harii restaurante, halo guesthouse, facilita ema ba luku, hakail no ba hare Baleia ne'ebé sempre la'o ba mai nsst Tenke fó prioridade ba konservasaun ai-parapa ne'ebé hetan estragus tanba atividade umana no projetu boot sira

		atividade hirak ne'e bele la'o hamosu mós programa no enkoraja setór sira seluk tama hodi hala'o di'ak liután Ezemplu ai-parapa aleinde proteje tasi ninin sira nu'udar mós fatin ba abitante sira seluk, produsaun masin, hakiak'ak budu tasi, dezenvolve área turizmu nsst.	Fasilita treinamentu ba comunidade sira hela iha área kosteira atu dezenvolve setór peska, akuakultura, hakiak budu tasi. Suporta sira ho ekipamentu atu kuidadu tanba Tasi nu'udar rekursu komún
Pag 1151	Atividade A410300: Desenvolver as Infraestruturas de Aquacultura e Operacionalizar os Centros de Viveiros de Peixe	Importante atu iha infraestrutura sira ne'ebé qualidade no dura ba tempu naruk atu tulun atividade peska hanesan mós sentru viveirus ikan atu distribui fini ikan ba comunidade sira ne'ebé interesse hakiak ikan.	Apoiou subsídiu ekipamentu no facilita kredit (funan ki'ik) atu comunidade estabelese no reforsa programa hakiak ikan Halo formasaun no kapasitasaun ba comunidade sira atu hakiak ikan iha sira nia fatin, inklui facilita merkadu Integra comunidade hirak ne'e iha Koperativa atu facilita malu no aprende hamutuk Kapasita pesoál sira iha sentru hodi tau matan ba viveirus ikan no sira bele fó treinamentu mós ba agrikultór sira oinsá atu hakiak ik
Pag 1156	Atividade A420202: Desenvolver e Melhorar a Implementação do Jardim Botânico	Jardín botaniku ne'e importante ba halo estudo, peskiza sientífiku no mós halo konsersaun liuliu estuda kona-ba ai-horis nativa Timor-Leste nian.	Jardín Botanico iha Remixio Aileu tenke prezerva variedade lokál ka variedade ne'ebé kleur ona moris no adapta iha ita rain Jardín Botaniku bele konserva no prodús fini lokál oin-oin iha ita rai, liuliu hare, batar, koto, fore no produktu seluk ne'ebé ita iha.
Pag 1158	Atividade A420208: Reflorestação e Reabilitação das Áreas Degradadas	Reflorestasaun ne'e importante tebes maibé presiza toma atensaun ba modelu intervensaun sira. Ezemplu, reflorestasaun la presiza uza mákina boot Presiza envolve comunidade iha programa reflorestasaun atu sira nu'udar benefisiáriu au mezmu tempu nu'udar protetor ba ambiente	Tenke uza métodu sustentavel no amigavel iha reflorestasaun no reabilitasaun, no envolve partisipasaun husi comunidade nudar nain Tenke servisu hamutuk ho Xefi suku no aldeia sira atu kaer responsabilidade hodi tau matan ba atividade floresta nian.